

Fasnacht 2017



**KNOCHESTAMPFER
WAGGIS**

SIT 1972

Sujet: L'Idiotie avec le Drämmli No 3

In mängger Hinsicht – muesch guet loose
anstatt z'saage – diend ys bloose
zaige mir ys de Franzoose
mit total abgsäggt Hoose
Fessehaim blybt ewig stoo
am Flugplatz duet au nyt me goo
und FCB-Fans, dasch au mies
losst me nur weeni zum PSG uff Paris
D Franzoose dien gärn wiete und verbiete
liggts ächtsch an de Pariser (wo jo au verhiete..)?
Aber ihre neyschte Buebestraich, dä kunnt jetz nämml
und do goots um unser Dreierdrämmli!
Nit gnueg, dass mer an ihri Wirtschaft dängge
und ene da äxtra Schlitte schängge
zum unsri Schnäpplijäger in ihri Lääde z längge
jetz dien sie ihrersytts ihr Hirni fascht verrängge
was fyr Verbott sy ys ächtsch kennte ynehänge
zum au dä Verdraag uff ihri Art y'zschrängge
derby hett me sich z Basel jo no aine gsteggt
damit dä Türk ganz sicher nit verreggt
dr Wessels sait : «Je suis le Roi –
de cette idiotie du numéro trois!»
und es koschtet en au gar kai Mieh
sich vo de Waggis ybere Disch lo z'zieh
zerscht hetter-ne im Gaischt jo scho fascht d Schiine gleggt
wo me pletzlich hindedryy entdeggt
jä do fäält jo – lachs der grad e Loch in Ranze
vo de Waggis d'Betriebsbewilligung fyr s Ganze
und au dr Drämmli-Typ haig sy verdrosse
me hätt en allwäg z Frankriich miesse baue losse
Sie welle nit irgendsoone Schlitte
um dr neyschti Flexity – miesse si bitte!
denn dien s'ys no mit Ginggernillis quääle
de Dyyre wurde francophoni SOS-Gnepf fääle
und bym Brämsliecht bruuchs e lychtends Rot
sunscht sächt me das in Saint-Louis sicher z spoot
Aber denn dr Clou vom Ganze – bitte seer
jede Hiwiis in däm Drämmli – läng mer s Gweer
miess dert ääne tout le monde verstoo
und zwar en francais – und wurd'das nit goo
no kenn me soone Kischte gar nit duureloo
und denn befiilt ys d'Grande Nation
au d'Drämmli-conversation
miess franzeesisch sy – c'est tout normal
mais s'il vous plaît – pas francais fédéral!
und das bedytttet fyr s ganz Personal

apprendre francais – tout-de-suite radikal!
 do wird mängge Drämmli uffbegeere
 jetz ka n y scho nit dytsch – und sott au no franzeesisch leere...
 e Drämmli fiehrer sait – das isch doch Schutt und Gröll
 wieso franzeesisch? my Dram das faart tout seul
 Mir vo dr BVB mache nit so gärn dr Tschooli
 en francais, nous, on n'aime pas faire le joli
 parler francais bruucht im Elsass doch kai Sau
 Waggisdyttsch z parliere, länggt by dääne-n-au
 um s Franzeesisch kenn me sich foutiere
 zum Bischpill kenn me saage ohni sich z geniere
 Ecoutez, Ihr Faargescht s gitt kai Grund sich z enerviere
 wenn er s Dram mien wäggsle, sait me däm changiere
 und wenn s e weeni stargg duet balangsiere
 diend – nom-de-Dieu – nit grad e Grossi fiehre
 wissener, no simmer halt grad am rangiere
 und mer dien ys jo denn doderfyyr au excüsiere...
 Dr Wessels sälber derfsch nit faare loo
 franzeesisch wurd me dä jo nie verstoo
 däm sym Olma-Brootwurscht-Dialäggd
 isch aim jo scho uff Dytsch total suspäggd
 Unser Dreier-Drämmli isch – dasch doch zum Hyyle
 wie alli andere die rainscht Reglaame-Syyle
 drum verlange d'Schynebinggis sicher jetze
 dass me au die Wärbig miessi ybersetze
 denn das gseet doch wirgglig jeden yy
 die versteen dert ääne nur «la vache qui rit»
 Isch die Franzooselinie wirgglig toll?
 mir sinn dr Mainig das isch plutôt folle
 Das Drämmli hätt nit wirgglig miesse sy
 Numéro trois, cette ligne d idiotie
 isch doch e biirewaichs fait accompli
 umso mee als me erfaart als dernier cri
 dass ene dr Wessels total superflu
 e Million im voruus yberwyyst – a fonds perdu
 Mit dääre BVB gitts ständig e Theater
 und vom Wessels hämmer lengschters scho e Kater
 in sym Krutt- und Kaabis-Departemänt
 grootet zimmlig alles uss de Händ
 und vom Bluemethal by dääre BVB
 griege mer au langsam s Ranzewee
 d Abkirzig «BVB» das sait scho dr'Beschrieb
 bedyttet ewig scho «Basels Verkeerti Betrieb»!
 bass nummen uff, bis es au dert emolle gracht
 wo jo ain dr ander wie ne whistleblower yberwacht!
 Aber s'bruucht vylicht jo gar nit sone Wääse
 um die Supermarché-Schnäpplijäger-Dreier-Schääse
 denn irgendnaime hämmer nämmlig glääse
 dä Drämmli typ dä syg jo gar nit so perfäggt
 au soone Flexity syg hie und doo defäggt
 und drum hett ys jetz dr Deyfel gritte
 fyr die doo dääts doch au e ganz en alte Schlitte!
 fyr die Route-de-Schampediss do wärsch doch uff em Damm
 und kenntsch erscht no Schiene spaare – mit eme Ressleridramm
 drum, Ihr Schnäggejädder, heered uff mit uff Gnuure
 Waggis, ferme ta guele – uf dytsch – halt d Schnuure
 wenn'd nit uffheersch, z Schigganiere, hämmer satt
 no blybt unsre Dreier nämmlig in dr Stadt
 und Eych schiggen mer ohni z Zeegere nämmlig
 unsre Waggiswaage oder ains vo unsren alte Summerdrämmli!

D Ladäärne-Uusstellig uff em Minschterplatz und d Waage- und
 Reggwisyte-Uusstellig bi dr Kasäärne sin vom Määntig znacht bis
 am Mittwuch demoorge! Deert und an de 3 Verkaufsständ (CINS) in
 dr Stadt kamen au alli Zeedel und Schnitzelbängg, d Blaggedde und
 dr Rädabäng kaufe.

Drugg: Druggerey Dietrich AG